

Regional News Unit AIR Aizawl
Monday, May 20, 2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- Vawk pulhri African Swine Fever avangin kum hian Mizoram chhungah vawk 817 an thi tawh a, vawk 1,034 suat a ni tawh bawk.
- Bangladesh atangin nunau ralflan 65 chu an sahimna zawngin Lawngtlai district-ah an rawn luh belh.
- Tukin dar 7 atang khan Lok Sabha inthlan thawhngana atan vote thlak a ni.
- Iran President Ebrahim Raisi leh sorkar mi pawimawhte chuanna helicopter chu nimin khan Iran hmarthlang lamah a chesual.

<><><>

ASF RECURRENCE

Vawk pulhri African Swine Fever (ASF) avangin kumin hian Mizoram chhungah vawk 817 an thi tawh ni a report a ni a, ASF vanga vawk suat tawh zat chu 1,034 a tling a ni.

Animal Husbandry & Veterinary Dept in a chhinchhiah danin nimin khan ASF vangin Chhingchhip khua-ah vawk pakhat a thih belh leh a, nimin vek khan vawk 17 suat a ni. ASF vanga vawk thi zat hi Kum 2021-22 khan 33,417 a ni a, kum 2022-23 khan 12,795 a ni a, kum 2023-24 chhungin 1,139 niin heti hian a vaiin ASF vanga vawk thi zat chu 47,351 a ni tawh a ni. ASF hri kai vanga vawk suat tawh zat hi kum 2021-22 khan 12,568, kum 2022-23 khan 11,686, kum 2023-24 chhungin 980 niin heti hian a vaiin vawk suat zat chu 25,234 a ni tawh a. Vawk thi avanga tanpuina dawng chhungkua 2,488 an awm tawh a. AH& Vety Dept chuan ASF vanga vawk chante tanpuina tur cheng nuai 311, sing 6 leh 6 an dil mek bawk.

Tunlai khawlum chhovah ASF hri a leng chho leh a, ran damlo nei an awm a nih chuan Animal Husbandry & Veterinary Dept phone no 1962 ah Doctor te biak rawn theih reng an ni tih AH & Vety Dept Deputy Director Dr.M. Zohmingthangi chuan a sawi a ni.

<><><>

POLICE POLLING

Election department hotute chuan Mizoram Police sang chuang state danga inthlan duty a chhuakte'n vote an thlak ve theihna tura ngenna an siam chu Election Commission of India-in vawi 2 a hnawl tawh a ni a ti.

Election department hotute chuan state pawna inthlanna buaipui tura kal Mizoram Police-te'n vote an thlak theih vena atan hian an dilpui thu an sawi a, Election Commission hian an ngenna chu vawi 2 a hnawlsak tawh thu leh a chhan an hriat bik loh thu an sawi a ni. Puan tawh angin MPC chuan Election Commission-a Principal Secretary SB Joshi hnena nimina lehkha an thehluhah state pawna Police duty-te'n vote tla chhiar hun, Jun ni 4 hma ngei a vote an thlak theihna tura ruahmanna siam turin an ngen a.

Vote 1,047 hian Mizoram Lok Sabha bial inthlan result turah awmze thui tak a nei thei dawn tih an tarlang. Electronically transmitted postal ballot system (ETPBS) hmanga vote an thlak theih reng lai a ruahmanna siamsak an ni lo chu hriatthiam har an tih thu an sawi a ni.

Mizoram Police mi 1,047-te hi Mizoram Lok Sabha bial inthlan hma daiha tirh chhuah an ni a. Election Commission-in hun hmasa lama postal ballot hmanga vote thlak titawpa an puala Facilitation Centre-a vote thlak buatsaih tura tih an nih lai-in Mizorama candidate chinfel a nih hma a an duty-na hmun pantir an nih avangin ruahmanna siamsak hman an ni lova. Hemi hi a chhan ni bera lang chu he lama mawh latu Ministry of Home Affairs-in Mizoram Chief Electoral Officer pisa kaltlang lova Home/Police department hnena lehkha an rawn thawn a, home/police lamin hmanhmawh taka an thawn chhuah vang a nih an rin thu an sawi a ni.

April ni 19-a Mizoram Lok Sabha bial inthlanna-ah khan vote tla kha za zela 56 point 87 chauh a ni a. Tunhma lam inthlan lo awm tawh ngaihtuahin vote tla hi a tlem hle a ni.

<><><>

REFUGEES

Nimin tuk khan Bangladesh atangin nunau raltlan 65 chu an sahimna zawngin Lawngtlai district-ah an rawn luh belh.

Bangladesh, Chittagong Hills Tract a tlangmite'n thuneihna sang zawk an ngiat vanga Bangladesh Sipai leh Kuki-Chin National Army (KNA) te tharum hmanga inbeihna nghawng kal zelah Pathianni zinglam dar 3 vel khan Bangladesh atanga an sahimna zawnga tlanhhia, mi 65 te'n Lawngtlai District a Vathiapui khua an lut. Heng raltlante hi Bawm hnam niin Lawngtlai a kan Corr Lalngheta Ralte chuan a sawi a. Mipa 38 leh hmeichhia 27 niin, nunau leh kum upa lam deuh te an ni a, an zingah hian damlo pawh an awm nual ni a sawi a ni.

Raltlan rawn lut thar te hi Vathuampui khawtlang chuan lo dawngsawngin, a tul angin an eitur leh tawm hulna turte an buaipui nghal a. Sorkar thuneitute lam pawhin rang takin thil awm dan an ngaihven nghal a ni.

<><><>

DENGUE SITUATION

Kum 5 chhung (kum 2019 leh kum 2023) inkar chhung khan Mizoramah Dengue hri vei mi 4,209 an awm a, an zinga mi 7 an thi.

Health and Family Welfare hnuai a State Vector Borne Disease Control Programme (SVBDCP) hotute hnen atanga thudawn danin kumin January ni 1 leh April ni 30 inkar khan Dengue hri kai a rinhlelh mi 2,347 sample endikah mi 132-in he hri hi an kai tih hmuhchhuah a ni leh tawh a, thi erawh an awm lo. Nikum 2023 kha Mizorama Dengue natna vei hmuhchhuah tam ber kum a ni a, sample 12,949 endikah mi 2,060-in Dengue natna an vei tih hmuhchhuah a ni a. Kum 2022 khan sample 5,252 endikah mi 1,868-in he hri hi an kai tih hmuhchhuah a ni bawk. Kum 2019 khan Dengue hri kai mi 131 an awm a. Covid-19 hri len vanglai khan Dengue hri kai hmuhchhuah an tlem a. Kum 2020-ah mi 67 leh 2021-ah mi 83 hmuhchhuah an ni.

Nunna chante hi Aizawl district ami vek an ni a. Kum 2020 khan mi 5 an thi a, nikum khan 2 an thih belh leh a ni.

Dengue hri kai hi Aizawl district-ah an tam ber a, nikum khan mi 1,757 in an vei a, nikum hmasa (2022) khan mi 1,683 vei an awm bawk a. Aizawl district dawtah Lunglei district-ah vei an tam ber chungin nikumah mi 193 in an vei a, kum dangah chuan 100 an tling ngai lo a ni.

<><><>

HIGHWAY CLEARED

Khawzawl leh Champhai district bawrhsapte hmalaknain National Highway-06 (Aizawl leh Champhai inkar kawngpui) hnawhtu leivung chu nimin atang khan lirthei chitin kalflang theihin laih tlang a ni.

Khawzawla kan Corr sawi danin nimin tuk zing dar 6 leh a chanve atang khan leivung tlak avanga kawngpui hnawh then fai hna thawh leh a ni a. Zing dar 09 vel atang khan kawng hi lirthei zawng zawng kal theihin laih tlang a ni. Puan tawh angin Khawzawl Vengthar VC leh NGO hrang hrangte'n Artlangpeng, Khawzawl Vengthar atanga Tuimuk panna kawng Shri Balaji Construction Company (SBCC) ten National Highway-06 an laih avanga an tihpin tak chu an ngen anga Balaji Company ten laih that hna an thawh mai loh avangin kawng sial hnatlang hi an nei ta a. He kawng sial that hnatlang an thawh avang hian National Highway hi leivungin a hnawh ta a ni.

Khawzawl Vengthar VC leh All NGO-te hian vawi engemawzat sawrkar lam thuneitute leh Balaji Company-te hi lo dawr tawhin, kawng hi sial tlang mai tur angin Company lamte hi beiseiawm takin an lo awm tawh thin niin an sawi a. Kar kal ta Thawhlehi a Balaji Company-ten kawng lai tlang tura thutlukna an lo siam tawh chu an bawhpelh tak avangin Ningani atang khan VC leh All NGO-te chuan kawngsial hnatlang hi tanin National Highway hi motor kal theih loh in an hnawh ta a ni.

Leivung paih fai nan hian Balaji Company lam in excavator rawn tumin , operator hi Khawzawl DC in a ngaihtuah sak a ni.

Hetihlai hian Khawzawl kianga National Highway No. 6 kawngpui tihpin a nih chungchangah Champhai South bialtu MLA, Lt.Col. (Rtd) Clement Lalhmingthanga chuan hma la zui zelin Inrinni tlai khan Champhai bawrhsap chu thil awmdan a zawt a. Khawzawl bula NH-6 an block a la tlang lo tih a hriatin a thusawi an ngai pawimawh tawk lo deuh a nih chuan sawi nawn tawh lo a, a tul anga hma lak zui a tum thu a hrilh nghal.

Nimin tuk khan Champhai leh Khawzawl district bawrhsap-te'n Champhai South bialtu MLA chu telephone hmanga bia-in kawngpui chu mipui te kal theiha an sial kuak thu leh road sign pawh khaw chhungah an dah vek thu an hrilh a ni. Kawngpui enkawl dan an bawh chhiat a vang a a sawkhawk (repercussions) sang tak a awm theihzia leh mahni duhthu a dan palzut mai mai tur a nih loh zia Pu Clement Lalhmingthanga hian a lo hrilh nghal bawk a ni.

<><><>

TRIPLETS BY REFUGEE

Zirtawpni zan khan Myanmar atanga Raltlan, Siaha a awm Pi Neipha, kum 29 chuan Lairam Christian Medical Centre, Lawngtlai-ah nausen 3 a hring.

Pi Neipha fa pai pathumte hi Damdawiin-ah hian doctor-te'n tha takin zai chhuahsak a. Pi Neipha hi Myanmar-a Matupi township a Sapaw khua atanga sahimna zawnga raltlan, Siaha a awm an ni a, fa kum 2 mi an nei mek bawk. Kumin April thla khan Siaha District Hospital-ah inentirin, a naupai chu 3 an ni tih hrilhhriat a ni a, Lawngtlai lamah inenkawl zui tura thurawn pek a ni a. Lawngtlai atang hian Falkawna State Referral Hospital lama kal tura thurawn pek leh a ni chungin harsatna an neih vangin Lairam Christian Medical Centre a Hmeichhe lam Doctor Bawi Chhin Sung chuan ngun taka enkawlin, May Ni 17 tlai dar 6 ah inzaina room ah lakluh a ni a. LCMC Medical Superintendent Dr. B. Zonunsanga leh Dr Bawi Chhin Sung te chuan darkar khat leh a chanve an buaipui hnu-ah, naute 3 chu tha takin zai chhuah an ni a, hmeichhia vek an ni.

Naute an zaichhuah hmasak ber hi Kg 2.500 a rit niin, a pahnihna chu Kg 1.800 a ni a, a hnuhnungber a an zaichhuah chu Kg 2.450 a ni. An vai hian an hriselna dinhmun pawh a pangngai vek a. Naute nu Pi Neipha hi thisen a tlakchham deuh vangin Doctor ten thisen unit 4 pek tura an tih chu pek niin, ngaihtuahawm a ni lo.

Pi Neipha chungchang hi LCMC lam chuan Doctors Without Borders hnenah an thlen a, anni hian Pi Neipha i te nufaho Damdawiin a an awm man zawng zawng hi an tumsak vek dawn a ni.

<><><>

5TH PHASE LS ELECTION

Tukin dar 7 atang khan Lok Sabha inthlan thawngana atan vote thlak a ni a.

State paruk leh Union Territory pahniha Lok Sabha bial 49 ah vote thlak a ni a. Uttar Pradesh ah seat 14, Maharastra ah seat 13, West Bengal ah seat 7, Odisha leh Bihar ah seat 5 ve ve, Jharkhand ah seat 3 leh Jammu and Kashmir leh Ladakh ah seat 1 ve ve ah te inthlan buatsaih a ni a.

Candidate langsar zingah BJP leader leh Union Minister Rajnath Singh, Piyush Goyal, Smriti Irani, Congress leader Rahul Gandhi leh KL Sharma, National Conference leader Omar Abdullah leh LJP leader Chirag Paswan te an ni a.

Inthlana duty turin mi nuai 9 sing li leh sang 7 chuang tirhchhuah an ni a. Polling station sing 9 sang li leh 732 an awm a.

Lok Sabha inthlan rual hian Odisha Assembly bial 35 ah vote thlak a ni bawk.

<><><>

IRAN PRESIDENT

Iran President Ebrahim Raisi leh sorkar mi pawimawhte chuanna helicopter chu nimin khan Iran hmarthlang lamah a chesual a. President Raisi hi an ram thenawm Azerbaijan nen an inrinaa tuikhuah hawanna hun a hman zawhah a haw lam a ni a. Chhum zing nasa leh khaw chhia avanga chesual nia hriat a ni a. Chhanchhuah hna thawh mek a ni a. President Raisi hi a thih leh dam chin hriat a la ni lo.

<><><>